



Broj: 01/1-50-1-1-94/10
Sarajevo, 3.3. 2010. godine

Z A P I S N I K

94. sjednice Ustavnopravne komisije

Sjednica je održana 3. 3. 2010., s početkom u 14 sati.

Sjednici su prisustvovali članovi Komisije: Šefik Džaferović, Adem Huskić, Velimir Jukić, Lazar Prodanović, Halid Genjac i Momčilo Novaković.

Član Komisije Drago Kalabić nije prisustvovao sjednici.

Osim članova Komisije, sjednici su prisustvovali predstavnici: Ministarstva pravde BiH Bojan Ninković, poslanik Denis Bećirović, iz Zakonodavno-pravnog sektora PSBiH Aida Kreho te iz Sektora za odnose s javnošću PSBiH Medina Delalić.

Sjednici je prisustvovao i sekretar Komisije Igor Bajić.

Nakon rasprave, Komisija je jednoglasno usvojila sljedeći

D N E V N I R E D

1. Usvajanje Zapisnika 93. sjednice Ustavnopravne komisije, održane 23. 2.2010.;
2. Predlog zakona o dopuni Krivičnog zakona Bosne i Hercegovine, predlagač: poslanik Denis Bećirović (**postupak u nadležnoj komisiji u skladu s članom 110. Poslovnika Doma**);
3. Ostala pitanja:
 - a. Prijedlog prečišćenog teksta Zakona o državnoj službi u institucijama Bosne i Hercegovine (**razmatranje i utvrđivanje prečišćenog teksta zakona u skladu s članom 41. stav (1) tačka i) Poslovnika Doma**);
 - b. Prijedlog prečišćenog teksta Zakona o ravnopravnosti polova u Bosni i Hercegovini (**razmatranje i utvrđivanje prečišćenog teksta zakona u skladu s članom 41. stav (1) tačka i) Poslovnika Doma**);
 - c. Realizacija obaveze za utvrđivanje prečišćenih tekstova Krivičnog zakona Bosne i Hercegovine, Zakona o krivičnom postupku Bosne i Hercegovine i Zakona o ministarstvima i drugim organima uprave Bosne i Hercegovine (**razmatranje pitanja u skladu s članom 41. stav (1) tačka i) Poslovnika Doma**).

Ad.1. Usvajanje Zapisnika 93. sjednice Ustavnopravne komisije, održane 23.2.2010.

Ustavnopravna komisija je bez rasprave jednoglasno usvojila Zapisnik 93. sjednice.

Ad.2. Prijedlog zakona o dopuni Krivičnog zakona Bosne i Hercegovine, predlagač: poslanik Denis Bećirović (postupak u nadležnoj komisiji u skladu s članom 110. Poslovnika Doma)

Predsjedavajući Ustavnopravne komisije otvorio je raspravu o Prijedlogu zakona i obavijestio da je poslanik Momčilo Novaković podnio dva amandmana na Prijedlog zakona. U raspravi su učestvovali: Momčilo Novaković, Denis Bećirović, Šefik Džaferović, Martin Raguž, Halid Genjac i Adem Huskić.

Ustavnopravna komisija, s dva glasa „za“ četiri glasa „protiv“ i dva „suzdržana“ glasa, nije prihvatila amandman I. koji glasi:

Amandman I.

Uvodi se novi član 250. b koji glasi:

„Član 250.b

- (1) U svrhu definiranja kriterija te utvrđivanja spiska organizacija, udruženja, političkih stranaka ili grupa iz stava (1) člana 250.a formira se posebna komisija.
- (2) Komisija broji devet članova. Članovi komisije su državljani BiH, objektivne osobe visokog integriteta i kredibiliteta koje nisu obavljale visoke političke i vojne dužnosti i koje pritom odražavaju nacionalnu, geografsku, ustavnu i spolnu strukturu BiH.
- (3) Članove komisije i predsjedavajućeg imenuje Parlamentarna skupština BiH na prijedlog Odbora za imenovanje.
- (4) Odbor za imenovanje konstituira Vijeće ministara i čine ga:
tri člana koje imenuje predsjedavajući i zamjenici predsjedavajućeg oba doma PSBiH, tri člana koje imenuju entiteti i to jedan kojeg imenuje Narodna skupština i dva koje imenuje Parlamentarna skupština Federacije BiH, četiri predstavnika javnog mnijenja i civilnog društva i jedan predstavnik sudskog i tužilačkog savjeta.
- (5) Odbor za imenovanje organizirat će proces sveobuhvatnog konsultiranja s javnošću i pozvati sve segmente društva BiH da daju svoje preporuke i identificira potencijalne članove komisije.“

Ustavnopravna komisija, s dva glasa „za“, četiri glasa „protiv“ i dva „suzdržana“ glasa, nije prihvatila amandman II. koji glasi:

Amandman II.

U stavu (1) člana 250.a riječi: „istorijski potvrđene kao“ brišu se.

Nakon rasprave Ustavnopravna komisija je, sa šest glasova „za“, bez glasova „protiv“ i s dva „suzdržana“ glasa.

- prihvatila tekst Prijedloga zakona o dopuni Krivičnog zakona Bosne i Hercegovine i predlaže Predstavničkom domu njegovo usvajanje;
- odlučila, u skladu s članom 113. Poslovnika Predstavničkog doma Parlamentarne skupštine Bosne i Hercegovine, da se za izvjestioca, u plenarnoj fazi, imenuje predsjedavajući Komisije Šefik Džaferović.

Ad.3. Prijedlog prečišćenog teksta Zakona o državnoj službi u institucijama Bosne i Hercegovine, (razmatranje i utvrđivanje prečišćenog teksta zakona u skladu s članom 41. stav (1) tačka i) Poslovnika Doma)

Ustavnopravna komisija jednoglasno je odlučila da se prijedlog prečišćenog teksta navedenog zakona ponovo razmotri na nekoj od narednih sjednica nakon što sekretarijat Komisije u saradnji s Ministarstvom pravde BiH razmotri uočene normativno-tehničke greške.

Ad.4. Prijedlog prečišćenog teksta Zakona o ravnopravnosti polova u Bosni i Hercegovini

(razmatranje i utvrđivanje prečišćenog teksta zakona u skladu s članom 41. stav (1) tačka i) Poslovnika Doma)

Ustavnopravna komisija jednoglasno je odlučila da se prijedlog prečišćenog teksta navedenog zakona ponovo razmotri na nekoj od narednih sjednica, nakon što Ministarstvo za ljudska prava i izbjeglice Bosne i Hercegovine dostavi prijedlog prečišćenog teksta ovog zakona.

Ad.5. Realizacija obaveze za utvrđivanje prečišćenih tekstova Krivičnog zakona Bosne i Hercegovine, Zakona o krivičnom postupku Bosne i Hercegovine i Zakona o ministarstvima i drugim organima uprave Bosne i Hercegovine (razmatranje pitanja u skladu s članom 41. stav (1) tačka i) Poslovnika Doma).

Ustavnopravna komisija jednoglasno je odlučila da od Ministarstva pravde Bosne i Hercegovine zatraži da pripremi prijedloge prečišćenih tekstova navedenih zakona i dostavi ih Ustavnoj komisiji.

Sjednica Komisije završena je u 15 sati.

SEKRETAR KOMISIJE
Igor Bajić

PREDSJEDAVAJUĆI KOMISIJE
Šefik Džaferović